

San Juan charo chũ'o tocha saosi'ea'me

Jesucristo Puka'ku Dios pa'iche kuasi'ere kuamũ

¹ Chũkũna ñasi'ena'me asasi'e mũsanũkonani Jesucristo pa'iche'te kuaku ie chũ'o tocha saomũ chũ'u. Ũcuachi'a chũkũna Repaũ'te sũ'ka pojosi-naa'me.

Apereparamũ chuta'a cheja cho'omarumũ cunaumũre Puka'ku Diona'me paniasomũ Repaũ Jesucristo. Cunaumũ Pa'ikũji icheja chejare caje pa'iu re'oja'che pa'iche mai rekoñoã vajũche jo'kasi'kuamũ Repaũ. Ũcuachi'a chũkũnani Puka'ku Dios pa'iche'te kuaku Repaũ chũ'uñe kuasi'kuamũ Repaũ.

² Repaũ Jesús kuache asajũ Repaũ'terejẽ'e ñasinajejũ masime chũkũna chura Puka'ku Dios pa'iche. Jã'ajekũna mũsanũkonare Jesucristo Puka'kũna'me Pa'ikũji mai pa'ichejare caje pa'iu maire ũcuauũkore re'oja'che che'choche asasinajejũ ũcuare kuame chũkũna.

³ Ũcuachi'a Jesucristoji che'chokũna asasinajejũ Dios pa'iche masime chũkũna chura. Repaũ'te ñasinajejũ Dios pa'iche masijũ Diona'me re'oja'che ja'me pa'ime chũkũna. Dios Mamaku'te Jesucristo'te ũcuachi'a re'oja'che ja'me pa'ime. Mũsanũkonapi asa chẽa chũkũnana'me re'oja'che pa'ijũ ũcuachi'a

Diona'me re'oja'che paapu chini chukuna ñasi'e peore kuame chukuna musanukonare.

4 Musanukonapi ña na'a rua pojojua paapu chini tocha saomua chu'ua ija'ova.

Dios re'oja'chechi'a cho'ochete kwamu

5 Ie chu'o chukuna'te Jesucristo che'chokuna asasi'kujeku kwamu chu'ua musanukonare. Ija'che che'chosi'kuamua Repau:

“Dios peore masiku'mua. Re'okujeku cu'achejê'e peokua'mua.” Jã'aja'ñe chiia pãi che'chosi'kuamua Jesucristo.

6 Pãi, “Diona'me re'oja'che pa'ime chukuna”, chiinapi cu'ache cho'oni chijachejaja'che cu'ache pa'inajejua joreme repana. Jã'aja'ñe cho'ona Dios chu'uañe cho'oma'me.

7 Repau Dios cu'achejê'e cho'oma'kujeku miañeja'ñe pa'ia re'oja'chechi'a cho'okua jorema'kuamua. Mai ũcuaja'che miañeja'ñe pa'ijua re'oja'che cho'ojua joremaneni sãinechi'a pojojua pa'ijanaa'me. ũcuachi'a Dios mai cu'a tu'nesõkaija'mua, Jesucristo maire jũni ro'ikaisi'jekuna.

8 “Pãi ũcuanuko cu'ache cho'onaa'me”, chiimua Dios. Jã'ajekuna maipi, “Cu'ache cho'omanaa'me chukuna”, chini joreme. Rũhiñe cuasamanajejua Repau i'kache jachame mai jã'aja'ñe i'kani.

9 Jã'ata'ni maipi, “Cu'ache cho'onaa'me chukuna”, chiijua mai cu'ache cho'ochete Dioni kuato jo'e cuasamaneja'mua Repau. “Jã'aja'ñe cho'oja'mua chu'ua”, chiisi'kujeku jorema'ñe re'oja'chechi'a cho'omua Dios. Jã'ajekuna mai cu'ache cho'ochete Repauni kuaru mai

rekoñoã pa'iche cu'a peore tũ'nesõkani jo'e cuasamaneja'mũ Repaũ.

¹⁰ Maipi, "Cu'ache cho'omanaa'me chũkũna", chiito cu'amũ. Jã'aja'ñe i'kani Dios i'kasi'ere jachajũ, "Joremũ Dios", chiime mai.

2

Dios Raosi'kũ Jesucristo maire sũekaikũ'mũ Pũka'kũ Diore

¹ Mũsanũkonare chũ'ũ chũijava'nare ie chũ'o mũsanũkonapi ña cu'ache cho'oma'ñe paapũ chini tocha saomũ chũ'ũ. Jã'ata'ni maipi cu'ache cho'oto Jesucristo Re'okũjekũ maire Repaũ Pũka'kũni sũekaimũ. "Ja'kũ, repaña cu'ache jo'e cuasamanejũ'ũ", chiiũ sũekaimũ Repaũ.

² "Cu'ache cho'ona repaña cu'ache cho'osi'e ro'ijanaa'me", chiimũ Dios. Jã'ata'ni Jesucristo mai cu'ache cho'osi'e ro'i jũni ro'ikakũna maire chura ro'iche peomũ. Jã'ata'ni mairechi'a ro'ikaima'ñe pãi ũcuanũkore ro'ikaisi'kũa'mũ Repaũ Jesucristo.

³ Maipi Diore masi cuasarepani Repaũ chũ'ũñe jachama'ñe cho'ome.

⁴ Jã'ata'ni pãi, "Diore cuasanaa'me chũkũna", chiinapi Repaũ chũ'ũñe cho'omaneni joreme repaña, Dios chũ'o ũcuarepare asa chẽamanajejũ.

⁵ Dios chũ'ũñe jachama'ñe cho'ona Diore masi cuasame. Jã'ajekũna maipi Repaũ chũ'ũñe'te cho'oni mai Repaũ'te masi cuasache masime.

6 Jesucristo cheja pa'irumꞤ cu'achejẽ'e cho'oma'ñe re'oja'chechi'a cho'osi'kua'mꞤ. Jã'ajekuna pãi, "Diore cuasanaa'me chukuna", chiinare, "Jesucristo pa'icheja'che re'oja'che pa'ijũ'ç", chiiç chũ'vamꞤ chũ'ç.

Pãi Dios chũ'usi'e asasinata'ni mamaja'ñe asajũ pa'iche'te kuamꞤ

7 Asarepajũ'ç, chũ'ç majapãijana. Ie chũ'o mꞤsanukonani Dios chũ'usi'ere kuara chini tohamꞤ chũ'ç. Jã'ata'ni mamachũ'oma'mꞤ ie. ApepꞤ mꞤsanukona asasi'ea'me.

8 Jã'ata'ni mꞤsanukona ie chũ'o asasinata'ni mamaja'ñe asajũ pa'ime chura. "Chekunare rꞤa cuasajũ oijũ pa'ijũ'ç", chiimꞤ Dios. Ichejare caje pa'iu Jesucristo pãi rꞤa oiu pa'isi'kua'mꞤ. Jã'ajekuna maire ũcuaja'che cho'ojũ paapꞤ chini jo'kasi'kua'mꞤ Repaũ. ApepꞤ maire chijachejaja'che cu'ache pa'ijũ vesujuna re'oja'che pa'icu'asi'kua'mꞤ. Chũra Jesucristoji cho'okaiuna miañeja'ñe re'oja'che pa'ime mai.

9 Pãi, "Diore cuasanaajejũ miañeja'ñe re'oja'che pa'inaa'me chukuna", chiinapi repaia majapãijanani cuheni chuta'a chijachejaja'che cu'ache pa'ijũ Diore cuasamanaajejũ chũ'ochi'a i'kame.

10 Repaia majapãijanare ña oinata'ni Diore masi cuasame. Ũcuachi'a Diore cuasanaajejũ miañeja'ñe re'oja'che pa'ijũ cacu'ama'me repaia.

11 Jã'ata'ni repaia majapãijanare cuhena Repaũni masi cuasamaapꞤ ũcua chijachejaja'che cu'ache pa'ijũ re'oja'che cuasachejẽ'e vesume

repana. Chijacheja ku'inaja'ñe pa'ivesujũ na'ava'na pa'icheja'che pa'ime repaña.

¹² Mũsanũkona chũ'ũ chĩijava'na, Jesucristoni cuasajũ rekoñoã cu'a tũ'nesõcojñorena iere chũ'o tocha saomũ chũ'ũ.

¹³ Mũsanũkona aina, Jesucristo'te chuta'a cheja cho'omarũmũ Pa'ikũni masime. Mũsanũkona põsũpãi, vati, "Cu'ache cho'ojũ'ũ", chiiche Dioni cuasajũ Ũcuajũ cho'okaiũna jachajũ re'oja'che pa'ime.

¹⁴ Mũsanũkona chũ'ũ chĩijava'na, Mai Ja'kũre Dioni masi cuasajũ pa'ime. Mũsanũkona aina, chuta'a cheja cho'omarũmũ Pa'ikũ'te masime. Mũsanũkona põsũpãi, Diopi cho'okaiũna re'oja'che pa'ime. Dios chũ'ũñe asa chẽasinajejũ vati cu'ache chũ'ũtojẽ'e cu'ache cho'oma'ñe pa'ime mũsanũkona. Dioni cuasajũna chũ'o tocha saomũ chũ'ũ mũsanũkonare ũcuaukore.

¹⁵ Diore cuasamana pa'icheja'che pa'imanejũ'ũ. Ũcuachi'a repaña cho'ocheja'che cu'ache cho'oũu chiimanejũ'ũ. Jã'aja'ñe paũu chiina Diore cuhenaame.

¹⁶ Diore cuasamana ija'che pa'ime: Cu'ache cho'oneejũ, chekũna nee tũa paauache ñajũ, "Chekũnare na'a rũa masinaame chũkũna", chijũ cuasame. Repaña cu'ache pa'iche Dios jo'kasi'ema'mũ. Diore cuasamana cu'ache cuasajũ cho'oche'me jã'a cu'a.

¹⁷ Cheja si'asõpĩ'ramũ. Na'a pa'isirũmũ cheja peoja'mũ. Ũcuaja'che cu'ache cho'ona peojanaame. Jã'ata'ni Dios chũ'ũñe cho'oneena Repau pa'ichejare ai sani si'arũmũ re'oja'che pa'ijanaame.

Dios chũ'o ũcuarepare che'chonana'me jorechũ'o che'chona pa'iche'te kũamũ

18 Asarepajũ'u, chũ'u chĩjjava'na. Chura cheja si'api'ramũ. Aperũmũ mũsanũkona, "Jesucristo'te rũa cuhekũji raija'mũ", chiiche asasi-naa'me. Chura Jesucristo'te cuhena pãi jainũko rani pa'ime. Repanapi rani pa'ijũna ña, "Cheja si'asõpi'ramũ", chiime mai.

19 Repana Jesucristo'te cuhena maire ja'me jovo pa'isinapi Diore cuasamanajejũ maire jo'ka sanisõsinaa'me. Maina'me Diore cuasana pani jo'ka saimanera'asinaa'me repana. Jã'ata'ni repanapi jo'ka sanisõrena ña masijũ, chekũna pãi, "Diore cuasamanaa'me jã'ana", chiime repanare.

20 Cristo mũsanũkonare ja'me paaũ chini Dios Rekocho'te raosi'kũa'mũ. ũcuarekochoji ja'me pa'iu cho'okaiũna Dios chũ'o ũcuarepare masime mũsanũkona.

21 Dios chũ'o ũcuarepa vesũjũna tocha saoma'ñe, mũsanũkonapi ũcuare masijũna ie chũ'o tocha saomũ chũ'u. Pãi chekũna te'ena, "Dios chũ'o che'chonaa'me chũkũna", chijũ jorechũ'ore che'chojũ chũ'o ũcuarepa che'choma'me.

22 Pãi Dios i'kasi'ere jachajũ, "Dios Raosi'kũma'mũ Jesús", chiina joreme. Jã'aja'ñe i'kajũ jachajũ Jesure Dios Raosi'kũre cuhejũ Pũka'kũ Diorejatũ'ka cuheme repana.

23 "Jesús Dios Mamakũma'mũ", chini Jesuni cuasamana Pũka'kũre ũcuachi'a cuasama'me. Jã'ata'ni, "Jesús Dios Mamakũ'mũ", chijũ Jesure cuasana Pũka'kũre Diore ũcuachi'a cuasame.

24 Mۇsanۇkona aperۇmۇ asa chēasi'e Dios chۇ'ore jo'kasōma'ñe cuasajۇ pa'ijۇ'ۇ. Jā'aja'ñe jo'kama'ñe cuasajۇ pani Dios Mamakۇna'me re'oja'che pa'ijanaa'me mۇsanۇkona. Ūcuachi'a Repaۇ Pۇka'kۇ Diona'me re'oja'che pa'ijanaa'me.

25 Repaۇ Jesucristo, “Mۇsanۇkona Dios pa'ichejare ai sani si'arۇmۇ pa'ijanaa'me”, chii's'kۇa'mۇ maire.

26 Chekۇna pāi jorejۇ cacۇ'oñu chiime mۇsanۇkonare. Repana jorena pa'iche'te kۇara chini ie chۇ'o tocha saomۇ chۇ'ۇ mۇsanۇkonare.

27 Jesucristo mۇsanۇkonani ja'me paau chini Dios Rekocho'te raosi'kۇa'mۇ. Raouna Repaۇ Dios Rekocho mۇsanۇkonare jo'kasōma'ñe ja'me pa'iu jorema'ñe Dios chۇ'o peore ūcuarepa re'oja'che che'chokۇ pa'imۇ mۇsanۇkonare. Jā'ajekۇna mۇsanۇkona chekۇnare che'chonare chiima'me. Dios Rekocho mۇsanۇkonare ūcuarepare che'chokۇ, “Jesucristo'te cuasache jo'kasōmanejۇ'ۇ”, chiiۇ chۇ'vamۇ. Repa chۇ'vache asa chēa jo'kasōma'ñe cuasajۇ pa'ijۇ'ۇ.

28 Asarepajۇ'ۇ, mۇsanۇkona chۇ'ۇ chiijava'na. Maipi Jesucristo'te cuasache jo'kasōmaneni Repaۇ icheja mai pa'ichejana jo'e cajerۇmۇ ña pojojanaa'me, Repaۇ'te cuasache jo'kasōmanesinajejۇ. Repaۇ'te cuasache jo'kasōnita'ni Repaۇ cajerۇmۇ ña vajuchujۇ katiñu chiijanaa'me mai.

29 Dios Mamakۇ Jesucristo re'oja'chechi'a cho'okۇ'mۇ. Jā'are masini ie ūcuachi'a masime mai: Pāi re'oja'chechi'a cho'ona Dios chii'a'me, Jesucristo repanare cho'okaisi'ejekۇna.

3

Diore cuasana Repaꝝ chĩijana pa'iche'te kꝝamꝝ

¹ Asarepajũ'u mꝝsanꝝkona. Mai Ja'kꝝ Dios maire rua chiiu, "Mꝝsanꝝkona chꝝ'u chĩia'me", chiimu. Jã'ajekꝝna Dios chĩia'me mai. Pãi chekꝝna Diore cuasamana Dios pa'ichejẽ'e vesꝝju ũcuaja'che mai pa'iche vesꝝme.

² Asarepajũ'u chꝝ'u cuasana. Chura Dios chĩia'me mai. Mai pa'ijache chuta'a vesꝝme mai. Jã'ata'ni chura iere masime: Icheja mai pa'ichejana Jesucristoji jo'e ratu Repaꝝ pa'iche masirepa ñajanaa'me mai jã'arꝝmꝝta'ni. Ũcuachi'a Repaꝝni ña Ũcuajana carũhijanaa'me.

³ Jã'ajekꝝna mai Repaꝝ'te cuasana Repaꝝ jo'e rairꝝmꝝ Ũcuajana carũhijañere cuasajꝝ po-jojꝝ cu'ache cho'oche ũhasõ Repaꝝ pa'icheja'che re'oja'che pa'ime.

⁴ Pãi cu'ache cho'ona Dios chũ'uñe jachasõme. Cu'ache cho'oche Dios chũ'u jo'kasi'ema'mꝝ.

⁵ Jesucristo mai cu'ache cho'oche'te tũ'nesõkasa chini icheja mai pa'ichejare caje pa'iu jũni ro'ikaisi'kua'mꝝ. Repaꝝ jmamakarꝝjẽ'e cu'ache cho'oma'kua'mꝝ. Chura mꝝsanꝝkona masime jã'a.

⁶ Pãi Jesucristo'te masi cuasana cu'are jꝝvoju re'oja'che pa'ime. Si'arꝝmꝝ cu'ache cho'ona Jesucristo pa'iche vesꝝme. Cu'are cho'ojꝝ Repaꝝ'te Jesucristo'te masi cuasama'me repaꝝna.

⁷ Asarepajũ'u, chꝝ'u chĩijana. Pãipi mꝝsanꝝkonani jorechũ'ore che'chojꝝ cacũ'oñu

chiito repana i'kachu'o asa chēamanejũ'u. Jesucristo re'oja'chechi'a cho'okũ'mũ. Jã'ajekũna pãi re'oja'che cho'ona Repau pa'icheja'che pa'ime.

⁸ Jã'ata'ni cu'ache cho'ona vati neenaa'me. Repau vati mamarũmũ cu'ache cho'okũ chuta'a irũmũjatũ'ka cu'ache cho'okũ pa'imũ. Jã'ajekũna Dios Mamakũ repau vati cu'ache cho'oche'te ũsera chini chejana cajesi'kũa'mũ.

⁹ Dios chĩi, Repau'te cuasana Dios Rekocho'te paajũ si'areparũmũ cu'ache cho'ojũ pa'ima'me. Repau chĩijejũ cu'achejẽ'e cho'ocuheme repana.

¹⁰ Pãi cu'ache cho'ona Dios chĩima'me, ũcuachi'a chekũnare cuasamana. Jã'ajekũna pãi cu'ache cho'ojũ chekũnare oimanare ña, "Dios chĩima'me ina; vati chũ'ũñe'te cho'ome", chiire'omũ.

Maire ũcuaukore pãi, "Chekũnare oiju pa'ijũ'u", chiimũ Dios

¹¹ Aperũmũ Dios chu'o apeche'cherũmũ Dios chũ'ũñe chekũnapi che'chojũna asasinaa'me mũsanũkona. Ija'che che'chosinaa'me repana: " 'Mũsanũkona pãi sãiñechi'a oiju cuasajũ pa'ijũ'u', chiimũ Dios maire ũcuaukore", chiiju che'chosinaa'me repana.

¹² Aperũmũ pa'isi'kũ Caín jã'aja'ñe cho'oma'ñe cu'ache cho'okũ paniasomũ. Repau cho'jeuta'ni re'oja'che cho'okũ paniasomũ. Jã'ajekũna ma-jaa'chu Caín cho'jeu'te cuhekũ vanisõasomũ, vati cu'ache chũ'ũñe cho'okũjekũ. Repau Caín pa'isi'eja'che pa'imaneñu mai. Re'oja'che pa'ijũ chekũnare oiju pañu.

13 Asarepajũ'u, chu'u chĩijana. Chekuna pãi Diore kuhena maire ũcuachi'a kuheme. Jã'ajekuna, "¿Je'se pa'ina jã'ana maire cuheche?", chiiju cuasamanejũ'u musanukona. Jã'aja'ne cho'ome pãi maire Jesure cuasanare.

14 Pãi chekunare cuasamana ũcuachi'a Diore cuasama'me. Repau'te cuasamana repa jũnisõsirumu Dios pa'icheja saima'ne vati toare ai sani uujũ pa'ijanaa'me. Mai Diore cuasanata'ni chekunare oinajeju chura iere masime: Repau'te cuasanajeju Dios pa'ichejana ai sani mai re'oja'che pa'ijache.

15 Pãi chekunare kuhena pãi vaina cuasache'te cuasame. Jũnisõsirumu Dios pa'icheja saimane-janaa'me repa. Jã'a masime musanukona.

16 Jesucristo mai cu'ache cho'oche jũni ro'ikaisi'kujeku maire oimu. Masime mai jã'a. Jesucristo maire oicheja'che chekunare oiju re'oja'che cho'okaiju pañu. Mai re'oja'che cho'oche'te ũseju chekunapi pe'ruju maire vanisõñu chiitojẽ'e ũcua chekunare re'oja'che cho'okaiju pañu.

17 Diore cuasana te'ena põse karama'ne paame. Chekunata'ni Diore cuasana chũova'na pa'ime. Jã'ajekuna põse paanare, "Chũova'na pa'inare ña oiju cho'okaijũ'u", chiimu chu'u. Ña oima'to cu'amũ. Chũova'na pa'inani ña oimaneni Diore cuasanama'me repa.

18 Asarepajũ'u, chu'u chĩijana. Maipi, "Chekunare oinaa'me chukuna", chiinata'ni repanare re'oja'che cho'okaima'to cu'amũ. Cho'omanapi i'kani peoche i'kame mai.

Chekunare oijũ ũcuarepa re'oja'che cho'okaijũ pañu mai.

“Dios cho'okaija'mũ chũ'ũre”, chini cuasaju vajũchũma'ñe Diore i'kache'te kũamũ

¹⁹⁻²⁰ Jã'aja'ñejekũna maipi pãĩ chekunani oni, “Diore masi cuasanaa'me”, chiire'omũ maire. Jã'ata'ni te'eñoã mai, “Dios chũ'ũñe si'areparũmũ cho'oma'kũa'mũ chũ'ũ”, chini oijũ cuasame. Jã'ata'ni Dios peore Masiũ mai rekoñoã pa'iche peore Ñakũ mai Repaũ'te masi cuasache ñamũ.

²¹ Maipi pãĩ chekunare oijũ pa'ito Diore vajũchũma'ñe sũere'omũ.

²² Ũcuachi'a maipi Repaũni pojojũ Repaũ chũ'ũñe re'oja'che cho'ojũ maire ũache'te sũeto re'oja'che ãsikũna koojanaa'me mai.

²³ Ija'chere chũ'ũmũ Dios maire: “Mũsanũkona chũ'ũ Neekũre Jesucristoni cuasaju Repaũ chũ'ũñe sãĩñechi'a cuhema'ñe cuasaju pa'ijũ'ũ”, chiiũ chũ'ũmũ Dios maire.

²⁴ Pãĩ Dios chũ'ũsi'e cho'ona si'arũmũ Ũcuauña'me re'oja'che pa'ime. Dios Rekocho maini ja'me paaũ chini Repaũ Raosirekochoji ja'me pa'iu, “Dios mũsanũkonare ja'me pa'imũ”, chiiũ kũakũna masime mai.

4

Diore cuasana cho'ochena'me Diore cuhena cho'ochẽ'te kũamũ

¹ Asarepajũ'ũ, chũ'ũ cuasana. Pãĩ mũsanũkonare, “Dios chũ'o che'chome chũkũna”, chiito repaña che'choche teana asamanejũ'ũ. Dios chũ'o ũcuarepa i'kato'te,

repana che'choche asajũ'u. Rũa jainũko jorechũ'o che'chona pa'ime icheja cheja.

² Jesucristo icheja cheja caje maija'iu pa'isi'kũa'mũ. Jã'are kũaju che'chona Dios chũ'u jo'kasi'ere chũ'o che'chome. Mũsanũkonapi repaña che'choche'te asani, "Dios Rekocho paame ina", chini repaña pa'iche cuasa masijanaa'me.

³ Repaña pãi, "Jesucristo Dios Raosi'kũma'mũ", chijũ che'choni Dios Rekocho peome. Na'a pa'isirũmu Jesucristo'te rũa cuhekũji raija'mũ. Mũsanũkona repaũ raijache asasinaa'me. Pãi te'ena repaũ cuasacheja'che cuasame chura pa'ina.

⁴ Asarepajũ'u, chũ'u chĩijana. Vati Diore cuhenare paaku'mũ. Mũsanũkonata'ni Dios chẽa paacojñonajeju repañare cajejaime, Diopi ja'me pa'iu cho'okaiũna. Vati na'a rũa masiku'mũ Dios.

⁵ Cu'ache che'chona vati neenaa'me. Jã'ajekũna repaũ chũ'uñe'te i'kaju che'chojũna Diore cuhena pãi asaju pa'ime.

⁶ Pãi Diore cuasana chũkũna Repaũ raosina che'choche'te asaju pa'ime. Repaũ'te cuasamanata'ni asacuheme. Jã'ajekũna Dios chũ'o asacuhenare ñani, "Diore cuasamanaa'me jã'ana", chiire'omũ. Jã'ata'ni pãi Dios chũ'o asaneenare, "Diore cuasame ina", chini repaña pa'iche'te ña masire'omũ maire.

Dios pãi ũcuanũkore oiche'te kũamũ

⁷ Asarepajũ'u, chũ'u cuasana. ũcuanũko sãiñechi'a cuasaju pañu mai. Jã'aja'ñe paaru

chini chũ'ũ jo'kasi'kua'mũ Dios maire. Pãi chekũnare cuasana Dios chĩijeju Repau pa'iche masime.

⁸ Pãi ũcuaukore oikũ'mũ Dios. Jã'ata'ni pãi chekũnare cuasamana maire Oikũ'te Diore cuasama'me.

⁹ Dios Repau Mamaku'te Ũcuate'euni chejana casosi'kua'mũ, maipi Repau'ni cuasaju re'oja'che pa'iju mai jũnisõsirũmũ Dios pa'ichejare ai sani paaru chini. Jã'ajekũna maipi Dios Mamaku'te casosi'ere cuasani, "Dios maire rũa oimũ", chijũ cuasame mai.

¹⁰ Mai rekoñoũ uache cuasaju chareparo Dioni cuasamanesinaa'me mai. Repau Dios maire rũa oikũjekũ Repau Mamaku'te chejana casũna caje pa'iu mai cu'ache cho'ochete ro'ikaiũ chuenisõsi'kua'mũ Repau.

¹¹ Asarepajũ'ũ, chu'ũ cuasana. Dios maire rũa oiũna mai ũcuachi'a chekũnare rũa cuasaju oiju paũu.

¹² Pãi te'eujẽ'e Diore ñamanaa'me. Jã'ata'ni maire chekũnare cuasanare Dios ja'me pa'imũ. Jã'ajekũna maini Ũcuauji cho'okaiũna chekũnare si'arũmũ na'a rũa cuasaju pa'ijanaa'me.

¹³ Dios maini ja'me paau chini Repau Rekocho'te raosi'kua'mũ. Ũcuarekochoji ja'me pa'iu cho'okaiũna Dios maire ja'me pa'iche masime mai. Ũcuachi'a mai Repau'na'me re'oja'che ja'me pa'iche masime.

¹⁴ Mai Ja'ku Dios Repau Mamaku'te chejana casosi'kua'mũ, Repau'te cuasanani Mamakuji chẽa paaku vati toa sani uuche'te ũsekaau chini.

Chukuna Repau'te Jesucristo'te cheja pa'irumũ ñasinajeju Repau pa'iche'te pãi ũcuanukore kuaju pa'ime, masia'ju chini.

15 “Jesús Dios Mamaku'mũ”, chiinachi'a pãi Diona'me re'oja'che pa'ime. Ũcuachi'a Repau'te cuasanare jo'kama'ñe ja'me pa'imũ Dios.

16 Dios maire rũa oiche'te masiju Repau'te cuasame mai. Pãi ũcuanukore rũa oimũ Dios. Jã'ajekuna pãi chekunare cuasache jo'kasõmana Diona'me re'oja'che pa'ijuna Repau repanare jo'kama'ñe ja'me pa'imũ.

17 Jesucristo Repau Puka'kure vajuchuma'ñe cuasamũ. Mai ũcuaja'che Repau'te Diore vajuchuma'ñe cuasaju pa'ime, Repauji maini oĩuna. Na'a pa'isirumũ Dios pãi ũcuanukore repaña cu'ache cho'osi'e ro'ia'ju chini chũ'uja'mũ. Maita'ni Repau'te cuasaju Repau pa'icheja'che re'oja'che pa'inajeju vajuchumanejanaa'me reparumũ tĩ'ato.

18 Jã'ata'ni, “Dios maire cu'ache cho'oja'mũ”, chiju cuasani vajuchura'ame. Vajuchuju, “Dios maire oima'mũ”, chiju cuasara'ame. Jã'ata'ni, “Dios maire rũa oikujeku cu'ache cho'omaneja'mũ”, chini cuasaju Repau'te vajuchuma'ñe cuasame.

19 Pãi te'eujẽ'e chuta'a Repau'te cuasamarumupi pãi ũcuanukore oiku'mũ Dios. Jã'ajekuna mai ũcuachi'a Repau'te maire charo cuasasi'kujekuna chura sãiñe cuasame.

20 Pãi te'ena, “Diore cuasanaa'me chukuna”, chiime. Jã'ata'ni repanapi chekunani majapãija'ñe pa'inani cuheni jorenajeju peoche i'kame. Chekunare majapãijanare repaña

ñanare cuhena, “Diore Ñoma'kureta'ni cuasame chukuna”, chiina peoche i'kame.

²¹ Jesucristo maire ija'che chũ'u jo'kasi'kua'mu: “Musanukona pãi Diore cuasana pani ũcuachi'a chekunare pãi cuasaju pa'ijũ'u”. Jã'aja'ñe chũ'u jo'kasi'kua'mu Repau maire.

5

Diore cuasana Ũcuauji cho'okaiuna vati chũ'uñe si'arum cho'oma'ñere kumam

¹ “Pãi ũcuaukore chũ'ua'ku chini Dios Raosi'kua'mu Jesús”, chini cuasana Dios chĩia'me. Dios chĩi chekuna Repau'te cuasanare mai Ja'ku Dios chĩijejuna cuasame.

² Maipi Dioni cuasaju Repau chũ'uñe cho'oni, “Chekunare Dios chĩi cuasame mai”, chiire'omu.

³ Maipi Dios chũ'uñe'te cho'oni Repau'te masi cuasame. Ũcuauji maini cho'okaiuna Repau chũ'uñe cho'ovesama'mu maire.

⁴ Repau chĩi, “Dios maire oiũ cho'okaija'mu”, chijũ cuasanajeju Ũcuauji cho'okaiuna vati chũ'uñe cho'oma'ñe re'oja'chechi'a cho'ome.

⁵ “Jesús Dios Mamaku'mu”, chijũ cuasanachi'a koka paaju vati chũ'uñe cho'oma'ñe pa'ime.

Dios Mamaku pa'iche'te kumam

⁶ Jesucristo icheja chejare caje pa'iu okorocojñosi'kua'mu. Na'a pa'iu mai cu'ache cho'ochete ro'ikaiũ kurususẽ'verona jẽ'jo nukorena jũnisõ chie meosi'kua'mu. Dios Rekochoji ũcuarepare chu'o kuakuna Jesús pa'iche masime mai.

7 Chotena cunaumũ pa'ina, “Jesús Dios Mamaku'mũ”, chiijũ kuame maire. Mai Ja'ku Dios Repau chu'ore kuamũ maire. Repau Mamaku ũcuachi'a kuamũ. Repau Rekocho ũcuachi'a kuamũ maire. Chotena ũcuate'ere chu'o kuame maire. Jã'aja'ñe kujuna masime mai Jesús pa'iche.

8 Ũcuachi'a chotemajña Repau cheja pa'irumũ cho'osi'ere cuasajũ Repau pa'iche masime mai. Repau'te Jesure okoroumucuse Dios Rekocho ũkupoja'ia cajesi'kuamũ. Cajena Dios cunaumũpi ija'che i'kasi'kuamũ: “Chu'ũ chĩa'mũ mũ'ũ”, chiisi'kuamũ Dios. Na'a pa'ia Repau Jesús Dios Mamakujekũ Repau chiepi mekuna jũni ro'ikaisi'kuamũ maire.

9 Pãipi ũcuauache i'kato repaña i'kache'te asa cuasame mai. Jã'ajekuna Dios na'a rua masakũ i'kasi'e, “Ũcuarepa'a'me”, chiijũ na'a rua cuasañũ mai, Repau, “Chu'ũ chĩa'mũ Jesús”, chiisi'e.

10 Dios Repau Mamaku pa'iche kuasi'e pãi te'ena asa jachama'ñe cuasajũ pa'ime. Chekunata'ni Dios kuasi'e asa jachajũ, “Joremũ Dios”, chini, cuasama'me.

11 Dios Repau Mamaku pa'iche'te kuakũ ija'che i'kaasomũ: “Chu'ũ chĩire cuasanachi'a jũnisõsirumũ chu'ũ pa'ichejare rani ai pa'ijanaa'me”, chinasomũ Dios.

12 Dios Mamaku'te cuasana jũnisõsirumũ Dios pa'ichejare ai sani re'oja'che pa'ijanaa'me. Repau'te Dios Mamaku'te cuasamanata'ni vati toana ai sani uujũ pa'ijanaa'me.

Cuhacho chũ'vasi'ea'me

13 Mũsanũkona Dios Mamakũ'te cuasana jũnisõsirũmũ Dios pa'ichejare ai sani re'oja'che pa'ijanaa'me. Jã'are masia'jũ chini mũsanũkonare ie chũ'o tocha saomũ chũ'ũ.

14 Jã'ajekũna, "Dios maire cho'okaija'mũ", chini masijũ Repau chũ'ũñe cho'ojũ maire uache'te sēeto asa, ĩsimũ Dios mai Repau'te sēeñe. Jã'are masijũ vajũchũma'ñe maire uache sēeme mai Repau'te.

15 Dios mai sēeñe peore asamũ. Jã'are masijũ, "Mai sēeñe Dios cho'okaija'mũ", chiijũ masime mai.

16 Mũsanũkonapi chekũna pãi cu'ache cho'oche'te ñani Dioni sēekaijũ'ũ repanare. Dioni sēekaito repanare re'oja'che pa'iche cho'okaija'mũ Dios. Jã'ata'ni repanapi cu'ache cho'oche'te jmakarũjē'e ũhacuheto Dioni sēekaijũ'ũ repanare chiima'mũ chũ'ũ. Cu'ache cho'oche ũhamanare jũnisõsirũmũ vati toana saoja'mũ Dios, repana cu'ache cho'osi'ere ro'ia'jũ chini.

17 Pãipi ũcuaũache cu'ache cho'oto cu'amũ. Dios rũa cuhemũ jã'aja'ñe cho'oche. Jã'ata'ni cu'ache cho'onapi repana cu'ache cho'oche'te ũhasõru Dios repana cu'ache cho'osi'e tũnosõ jo'e cuasama'mũ.

18 Pãi Diore cuasana Repau chĩijejũ si'areparũmũ cu'ache cho'ojũ pa'ima'me. Vati repanare Diore cuasanare cu'ache chũ'ũra chiimũ, repanapi cu'ache cho'oa'jũ chini. Jã'ata'ni Jesucristo Dios Mamakũji ũsekaiũna

repana cu'ache cho'oma'ñe pa'ime. Jã'are masime mai.

¹⁹ Pãi Diore cuhena vati chũ'ũñe'te cho'oju pa'ime. Maita'ni Dios chũ'ũñe'te cho'oju pa'inaa'me Repau neenajeju. Jã'are masime.

²⁰ Jesucristo, Dios Mamaku chejare caje pa'ia Puka'ku pa'iche'te che'chosi'kua'mu, pãipi Diorepau pa'iche'te masia'ju chini. Jã'are masime mai. Dios Mamarepakani Jesucristo'te masi cuasanajeju Dios pa'ichejare ai sani pa'ijanaa'me mai.

²¹ Asarepajũ'u, chu'u chijana. Vati chũ'ũñe cho'oma'ñe pa'ijũ'u. Re'omu.

Juan

Koreguaje

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025

87a345ac-83c6-51ad-8750-17a703f38bcc